

Na osnovu člana 27. stav 1., člana 32. stav 1. Zakona o Fondu za zaštitu okoliša Federacije Bosne i Hercegovine („Službene novine Federacije BiH“ broj: 33/03), člana 7., člana 33. stav 1., člana 34. stav 1., člana 36. Statuta Fonda za zaštitu okoliša Federacije Bosne i Hercegovine („Službene novine Federacije BiH“ br: 33/06), člana 5. Pravilnika o postupku objavljivanja konkursa i o odlučivanju o odabiru korisnika sredstava Fonda („Službene novine Federacije BiH“ broj: 73/10), a u vezi sa Programom rada i Finansijskim planom Fonda za zaštitu okoliša FBiH za 2015. godinu („Službene novine FBiH“ broj: 100/14) i Odluke Upravnog odbora o raspisivanju Javnog konkursa za korištenje sredstava Fonda za zaštitu okoliša Federacije Bosne i Hercegovine za 2015. godinu broj: UO-3-7-2/2015, Fond za zaštitu okoliša Federacije BiH r a s p i s u j e:

JAVNI KONKURS

za dodjelu sredstava za realizaciju programa, projekata i sličnih aktivnosti iz područja zaštite okoliša za 2015. godinu

I. PREDMET JAVNOG KONKURSA

Predmet Javnog konkursa je prikupljanje prijava za programe/projekte za raspodjelu sredstava, a koji će se odnositi na sljedeće programske aktivnosti:

LOT 1. Projekti zaštite voda od značaja za FBiH po Odluci Vlade FBiH

Vlada Federacije BiH je kroz potpisane međunarodne ugovore, zadužena za upravljanje, podršku i koordinaciju realizacije većeg broja razvojnih projekata iz oblasti voda, koji se finansiraju vlastitim sredstvima i/ili sufinansiraju kreditnim i grant sredstvima međunarodnih finansijskih institucija. Pod ovim lotom Fond planira pratiti projekte zaštite voda od značaja za FBiH za koje je Vlada Federacije BiH dala saglasnost („Službene novine FBiH“ broj: 8/13).

U ovisnosti od načina implementacije, u projekte iz oblasti zaštite voda spadaju:

- projekti zaštite vodnih resursa,
- projekti komunalne infrastrukture: odvodnja otpadnih voda (oborinska, tehnološka i fekalna kanalizacija), i
- postrojenja za tretman sanitarnih i tehnoloških otpadnih voda.

Tip i vrste projekata su dati u pomenutoj Odluci.

LOT 2. Projekti i studije u cilju ispunjavanja ciljeva Federalne strategije zaštite okoliša

Ovim lotom se planira korištenje sredstava Fonda za finansiranje projektne dokumentacije i studija iz oblasti zaštite okoliša i to posebno: zaštite voda, tretmana otpadnih voda, zaštite izvorišta, zaštite i poboljšanja kvaliteta zraka, projekti kojima se promovira uvođenje čistijeg transporta kao doprinos smanjenju emisije stakleničkih plinova, obrade otpada, zaštite biološke i pejzažne raznovrsnosti kojima se stvaraju preduslovi za:

1. dalje aktivnosti na realizaciji i implementaciji planova,
2. istraživanja u oblasti odsumporavanja dimnih gasova i razvoja odgovarajućih tehnologija,
3. za apliciranje i podsticanje programa za finansiranje po osnovu sporazuma i grantova iz domaćih i međunarodnih fondova,
4. kao preduslov za povoljne kreditne linije.

LOT 3. Projekti uspostavljanja federalne mreže monitoringa kvaliteta zraka

Shodno Strategiji zaštite okoliša cilj monitoringa kvaliteta zraka Federacije BiH je određivanje kvaliteta zraka u stanicama pozadinskog zagađivanja, regionalnog i prekograničnog daljinskog prijenosa, te praćenja u okviru međunarodnih obaveza države, na područjima nacionalnih parkova, zaštićenih pejzaža, zaštićenih područja, spomenika prirode, osjetljivih okolišnih sistema, te kulturnog i prirodnog naslijeđa i u naseljima i u industrijskim područjima.

LOT 4. Projekti zaštite okoliša kao podrška razvoja lokalnih zajednica

Ovim lotom se planira korištenje sredstava Fonda za finansiranje projekata zaštite okoliša, prvenstveno kao podrška razvoju lokalnih zajednica i to za oblasti:

- Upravljanje otpadnim vodama, što obuhvata izgradnju ili sanaciju kolektorskih mreža, tretman otpadnih voda i slične aktivnosti,
- Zaštita izvorišta koja služe za snabdijevanje vodom stanovništva. Ova programska aktivnost obuhvata i istražne radove u cilju utvrđivanja i praćenja kapaciteta i kvaliteta izvorišta te provođenja mjera zaštite, uspostavljanje zaštitnih zona i sl.,
- Projekti održivog korištenja voda u vidu smanjenja gubitaka u mrežama, te pomoći najmanje razvijenim jedinicama lokalne samouprave koja nemaju snage razvijati vlastite kapacitete,

- Zaštita zraka urbanih sredina u smislu smanjenja emisija štetnih plinova od saobraćaja,
- Projekti poboljšanja, očuvanja i monitoringa kvaliteta zraka kao što su općinski i kantonalni projekti sadnje nove i revitalizacije postojeće dendroflore u ulicama i parkovima gradova i sl.

LOT 5. Projekti jačanja javne svijesti o značaju zaštite okoliša

Projekti koji se odnose na jačanje javne svijesti, promociju projekata i programa zaštite okoliša i energetske efikasnosti, promociju obrazovanja i istraživanja u području zaštite okoliša s ciljem poboljšanja kvalitete okoliša i prirodnih vrijednosti.

LOT 6. Projekti u oblasti zaštite zraka i energetske efikasnosti

Projekti u ovoj oblasti se odnose na smanjenje emisija štetnih plinova od industrije i saobraćaja, na poboljšanje i očuvanje kvalitete zraka naročito u urbanim sredinama, te na projekte energetske efikasnosti gdje će se prioritet dati onim mjerama u području djelovanja s najvećim potencijalom za smanjenje emisija stakleničkih plinova, i to:

- Istraživanja učinkovitije upotrebe sirovina i energenata,
- Sprečavanje nastanka opasnih i otrovnih tvari iz proizvodnih procesa,
- Uspostava sistema za kontrolu i monitoring emisija štetnih plinova, te kvaliteta zraka,
- Ulaganja u povećanje energetske efikasnosti, a naročito izrada detaljnih energetskih audita za javni sektor, poboljšanje energetske efikasnosti u javnom sektoru kao što su uspostava energetske učinkovite i ekološke javne rasvjete i smanjenje potrošnje energije u zgradama državne uprave i jedinica lokalne samouprave, gdje se prioritet daje zdravstvenim i odgojno obrazovnim institucijama,
- Projekti smanjenja saobraćajnog opterećenja, te podsticanje istraživanja biotehničkih i hortikulturnih rješenja kojima se doprinosi smanjenju zagađenja zraka u urbanim područjima, te prostorno i urbanističko planiranje s ciljem planiranja kvalitete zraka.

LOT 7. Projekti u oblasti upravljanja otpadom

Odvojenim prikupljanjem otpada sprječava se zagađenje tla, vode i zraka. Naravno ekonomski efekti kao rezultat prikupljanja, sortiranja i reciklaže otpada, korištenja otpada kao sekundarne sirovine ili kao energenta, smanjenje proizvodnih troškova, ušteda energije, smanjenje uvoza ambalažnog otpada, smanjenje količina koje se odlažu, razvoj privrede,

ugradnja novih tehnologija i otvaranje novih radnih mjesta i dr, su ključni argumenti kojim će se vrednovati projekti u ovoj oblasti.

Postupni razvoj sistema kvalitetnog upravljanja otpadom podrazumijeva najprije izrade studija i planova upravljanja otpadom, a zatim ulaganja u sisteme primarnog odvajanja otpada (za nabavku kanti, kontejnera i zelenih otoka) radi smanjenja nastajanja otpada i korištenja njegovih vrijednih svojstava, te opremanje reciklažnih dvorišta i transfer stanica, te su kao prioritetni projekti oni koji se odnose na:

- formiranje zelenih otoka radi poticanja selekcije otpada na mjestu nastanka,
- projektovanje, izgradnja i/ili opremanje reciklažnih dvorišta,
- poticanje projekata ponovne upotrebe otpada,
- poticanje razvoja reciklažne djelatnosti,
- korištenje otpada kao energenta i sl.

II. KORISNICI SREDSTAVA KOJI IMAJU PRAVO NA PODNOŠENJE PRIJAVE

Pravo učešća imaju pravne osobe, jedinice lokalne uprave (gradovi i općine), javne ustanove, privredna društva i druge pravne osobe i to kako slijedi:

LOT 1.: Pravo učešća imaju jedinice regionalne i lokalne uprave (kantoni, gradovi i općine), javna preduzeća, ustanove i privredni subjekti,

LOT 2.: Pravo učešća imaju jedinice regionalne i lokalne uprave (kantoni, gradovi i općine), javna preduzeća i ustanove i privredni subjekti,

LOT 3.: Pravo podnošenja prijava projekata imaju isključivo institucije nadležne za uspostavljanje federalne mreže monitoringa kvalitete zraka,

LOT 4.: Pravo učešća imaju jedinice regionalne i lokalne uprave (kantoni, gradovi i općine), javna preduzeća i ustanove,

LOT 5.: Pravo učešća imaju javne, naučne i visokoškolske institucije, udruženja i druge neprofitne organizacije, medijske kuće i privredna društva,

LOT 6.: Pravo učešća imaju jedinice lokalne uprave (kantoni, gradovi i općine), javna preduzeća i ustanove i privredni subjekti,

LOT 7.: Pravo učešća imaju jedinice lokalne uprave (kantoni, gradovi i općine), te javna komunalna preduzeća i privredni subjekti.

III. USLOVI KOJIMA PODNOSICI PRIJAVE MORAJU UDOVOLJAVATI / KORISNICI SREDSTAVA KOJI IMAJU PRAVO NA PODNOŠENJE PRIJAVE

Pravna lica kojima se dodjeljuju finansijska sredstva (u daljem tekstu: Korisnici), moraju ispunjavati sljedeće uslove:

- Da imaju sjedište na teritoriji Federacije Bosne i Hercegovine;
- Da ulažu vlastita sredstva u programe, projekte i slične aktivnosti u području zaštite okoliša;
- Da prihvate uslove zajedničkog sudjelovanja u sufinansiranju programa, projekata i sličnih aktivnosti za koje se odobravaju sredstva Fonda propisana općim aktima Fonda;
- Podnesu zahtjev za korištenje sredstava Fonda u skladu sa objavljenim konkursom;
- Da zaključe ugovor sa Fondom o zajedničkom ulaganju u program, projekat ili drugu aktivnost za koje se odobravaju sredstva Fonda;
- Uovoljavaju i drugim uslovima utvrđenim konkursom,

Pod vlastitim učešćem, podrazumijevaju se novčana sredstva korisnika, osnovna sredstva pribavljena radi realizacije ulaganja koja finansira Fond, kreditna sredstva drugih finansijskih institucija, ulaganja ili ulog drugih fizičkih i pravnih lica.

IV. NEOPHODNA DOKUMENTACIJA ZA SUDJELOVANJE

Sredstva iz Javnog konkursa po navedenim programima, dodjeljuju se na temelju prijave projekta/programa Korisnika i kompletne prateće dokumentacije.

Obrazac za prijavu projekta i obrazac finansijskog pregleda projekta moraju biti popunjeni na računaru, na obrascima koji su dostupni na službenoj web stranici Fonda za zaštitu okoliša Federacije Bosne i Hercegovine: www.fzofbih.org.ba.

Obrazac za prijavu projekta, obrazac finansijskog pregleda projekta i obavezna dokumentacija, trebaju biti dostavljeni prema redoslijedu sa prijavnog obrasca i poslani u A4

formatu koverta. Obavezna dokumentacija treba biti odvojena od dokumentacije za preporuku.

Aplikacija u cjelosti mora biti dostavljena u štampanoj formi, i to u jednom originalu i jednoj kopiji, uvezane, sa numerisanim, ovjerenim i potpisanim stranicama od strane ovlaštene osobe.

Na koverti, umjesto adrese, zalijepiti popunjeni obrazac aplikanta koji se nalazi na prethodno navedenoj web stranici.

Obavezna dokumentacija mora sadržavati:

1. Popunjen obrazac/prijavu projekta na Javni konkurs, numerisan, ovjeren i parafiran;
2. Popunjen obrazac finansijskog pregleda projekta, numerisan, ovjeren i parafiran;
3. Ovjerenu izjavu o namjenskom trošenju sredstava;
4. Ovjerenu izjavu korisnika da je spreman obezbjediti instrument osiguranja u skladu sa zaključenim ugovorom;
5. Dokaz o registraciji aplikanta kod nadležnog organa (aktuelni izvod iz sudskog registra za pravna lica, izuzev jedinica lokalne samouprave);
6. Uvjerenja o poreskoj registraciji (ID broj i PDV broj ukoliko su PDV obveznici). Ukoliko aplikant nije PDV obveznik, dostaviti uvjerenje Uprave za indirektno oporezivanje;
7. Uvjerenje da nije pod stečajem ili pred likvidacijom, ili je ušao u određen aranžman s povjeriocem, ili je obustavio ili ograničio poslovne aktivnosti, ili je u analognoj situaciji koja proističe iz sličnog postupka u skladu sa relevantnim zakonima i propisima u FBiH – odnosi se na privredne subjekte;
8. Uvjerenje da nije predmet postupka za proglašenje stečaja, za izdavanje naloga za prisilnu likvidaciju ili postizanje sporazuma/aranžmana s povjericima, ili bilo kojeg sličnog postupka u skladu sa relevantnim zakonima i propisima u FBiH – odnosi se na privredne subjekte;
9. Uvjerenje o izmirenim poreskim obavezama nadležnih organa – Poreske uprave i Uprave za indirektno oporezivanje zaključno sa 31.12.2014. godine;
10. Uvjerenje o izmirenim obavezama prema PIO/MIO i zdravstvenom osiguranju zaključno sa 31.12.2014. godine.

Obavezna dokumentacija je uslov učešća i aplikacije koje ne budu sadržavale istu neće se razmatrati.

Dodatna obavezna dokumentacija po LOT-ovima:

LOT 1:

1. Dokaz da se radi o projektu zaštite voda od značaja za FBiH nadležnog ministarstva ili nadležne Agencije;
2. U procesu apliciranja neophodno je da aplikant obezbijedi pismo podrške institucije koja vodi projekat, odnosno tima za implementaciju projekta;
3. Detaljnu finansijsku konstrukciju cjelokupnog projekta sa prikazom definitivno obezbijeđenih sredstava;
4. Odobrenje za izvođenje radova odnosno izjava o urađenoj projektnoj dokumentaciji.

LOT 2:

1. Projektni zadatak ovjeren od strane aplikanta za izradu studije ili projektne dokumentacije,
2. Ovjerena izjava o usklađenosti projekta/studije sa strateškom i planskom dokumentacijom,
3. Ovjerena izjava o korištenim/nekorištenim budžetskim i ostalim potporama u prethodne 2 godine sa aspekta izvora, visine i namjene sredstava.

LOT 3:

1. Dokaz o nadležnosti za uspostavljanje federalne mreže monitoringa zraka,
2. Preporuka Federalnog ministarstva okoliša i turizma za predloženi projekat,
3. Plan uspostavljanja federalne mreže monitoringa zraka,

LOT 4:

1. Ukoliko su u pitanju radovi, ovjerena izjava da je pripremljena projektna dokumentacija,
2. Ukoliko su u pitanju radovi/robe, dostaviti ovjeren predmjer radova, odnosno specifikaciju opreme,

3. Projektni zadatak – ako je u pitanju izrada projektne dokumentacije,
4. Ukoliko su u pitanju projektovanje i radovi, obavezno priložiti projektni zadatak, te ovjerenu izjavu aplikanta da će prije otpočinjanja radova dostaviti Fondu ovjeren projekat, te pribavljene saglasnosti i dozvole,

LOT 5:

1. Plan istraživanja, ako su u pitanju naučno-istražvački projekti,
2. Medija plan, ako su u pitanju aktivnosti medijske promocije zaštite okoliša,
3. Projektni zadatak za aktivnosti udruga u području zaštite okoliša,
4. Plan aktivnosti ukoliko su u pitanju manifestacije, seminari, konferencije i slično.

LOT 6:

1. Projektni zadatak – ako je u pitanju izrada projektne dokumentacije ili energetskog pregleda
2. Ukoliko su u pitanju radovi, ovjerena izjava da je pripremljena projektna dokumentacija,
3. Ukoliko su u pitanju radovi/robe, dostaviti ovjeren predmjer radova, odnosno specifikaciju opreme,
4. Ukoliko su u pitanju projektovanje i radovi, obavezno priložiti projektni zadatak, te ovjerenu izjavu aplikanta da će prije otpočinjanja radova dostaviti Fondu ovjeren projekat, te pribavljene saglasnosti i dozvole,

LOT 7:

1. Projektni zadatak ovjeren od strane aplikanta ukoliko se radi o projektnoj dokumentaciji,
2. Ovjerena izjava kod FMOIT-a da aplikant posjeduje sve uvjete za pristupanje modelu integralnog upravljanja otpadom, ukoliko se radi o izvođenju radova i/ili nabavci opreme (ne primjenjuje se na privredne subjekte);
3. Ovjerena izjava općine da aplikant ima odobrene lokacije za izgradnju reciklažnog dvorišta i/ili instaliranje zelenih otoka, ukoliko se radi o izvođenju radova i/ili nabavci opreme;

4. Ovjerena izjava da je urađen projekat/elaborat, ukoliko se radi o izvođenju radova i/ili opremanju zelenih ostrva ili reciklažnog dvorišta,
5. Ovjeren predmjer radova, odnosno specifikacija opreme, ukoliko se radi o izvođenju radova i/ili opremanju zelenih ostrva ili reciklažnog dvorišta,
6. Ovjerena izjava o korištenim/nekorištenim budžetskim i ostalim potporama u prethodne 2 godine sa aspekta izvora, visine i namjene sredstava.

Kompletnost dodatne obavezne dokumentacije će utvrditi Komisija za stručni pregled aplikacija, te ukoliko se ustanovi da aplikant nije priložio potrebne dokumente, njegova aplikacija neće se uzeti u razmatranje i neće se stručno bodovati.

Aplikanti mogu dostaviti i ostale dodatne dokumente koji će se uzeti u obzir kod bodovanja aplikacije, kao što su:

- preporuke nadležnih općinskih, kantonalnih ili federalnih institucija,
- dokazi o provedenoj proceduri odabira konsultanta u skladu sa ZJN-a sa specifikacijom usluga iz tendera, ako je ista već obavljena,
- izvod iz okolišne dozvole koji se tiče aplikacije, za projekte koji se tiču zadovoljavanja uvjeta postavljenih kroz dozvolu,
- kopiju potrebnih saglasnosti i dozvola za izvođenje radova,
- jasno izveden dokaz/izjavu o efektima koji će se postići u smislu smanjenja emisija,
- odobren plan prilagođavanja upravljanja otpadom, koji predviđa selektivno prikupljanje otpada na mjestu nastanka ili putem kasnijeg selektiranja,
- dokaz/izjavu o efektima koji se namjeravaju postići prijavljenim projektom,
- promotivnu dokumentaciju kojom dokazuju vlastite sposobnosti i aktivnosti zaštite okoliša.

V. VREDNOVANJE PROJEKATA

Vrednovanje i rangiranje projekata pristiglih na Javni konkurs, vršiti će posebna Komisija koju imenuje direktor Fonda.

Komisija razmatra projekte primljene na bazi Javnog konkursa, cijeni ispunjenost uslova i kriterija za odobravanje istih, sačinjava zapisnik s obrazloženom ocjenom i mišljenjem te isti

dostavlja direktoru Fonda, koji izrađuje listu prihvatljivih projekata za sufinansiranje na bazi Javnog konkursa za dodjelu sredstava za realizaciju programa, projekata i sličnih aktivnosti iz područja zaštite okoliša za 2015. godinu.

Na prijedlog direktora, Upravni odbor Fonda donosi odluku o dodjeli sredstava korisnicima. Rezultati Javnog konkursa o izboru korisnika sredstava, biti će objavljeni na službenoj web stranici Fonda www.fzofbih.org.ba, u roku od 15 dana od dana donošenja odluke.

Prije donošenja odluke o odabiru, Fond zadržava pravo zatražiti dodatna pojašnjenja projekta od predlagatelja, kao i pravo odbijanja pristiglih projekata bez posebnog obrazloženja.

VI. OPĆE ODREDBE

Obrasci za prijavu po ovom Javnom konkursu i Smjernice za korisnike sredstava Fonda za zaštitu okoliša FBiH, mogu se preuzeti na službenoj web stranici Fonda za zaštitu okoliša FBiH: www.fzofbih.org.ba.

Prijava za učestvovanje s obaveznom projektnom dokumentacijom, dostavlja se lično ili putem pošte na adresu: **Fond za zaštitu okoliša Federacije Bosne i Hercegovine, ul. Hamdije Čemerlića 39a, 71 000 Sarajevo.**

Prijava se dostavlja u zatvorenim neprovidnim kovertama sa naznakom:

„NE OTVARAJ – PRIJAVA NA JAVNI KONKURS – LOT BR. _____“.

Rok za podnošenje prijave je 30 dana od dana objavljivanja Javnog konkursa u „Službenim novinama Federacije BiH“.

Zahtjevi s nepotpunom dokumentacijom, podneseni nakon roka i utvrđene forme, neće se razmatrati.

Važne napomene:

Aplikant na jedan LOT može konkurisati samo jednim projektom.

U koverti može biti samo jedan projekat. Ukoliko jedna koverta sadrži više projekata, aplikacija se odbacuje.

Da bi aplikant ušao u konkurenciju za odabir na Javnom konkursu, mora ispuniti pravno-formalne uslove iz ovog Javnog konkursa – odnosno dostaviti kompletnu obaveznu dokumentaciju.

Svi dokumenti koji se predaju uz obrazac prijave projekta kao dokaz o ispunjavanju kriterija sudjelovanja iz ovog konkursa, moraju biti originali ili ovjerene kopije, ne starije od tri mjeseca.

Dokumenti koji se šalju na Javni konkurs, ne vraćaju se aplikantu.

Neadekvatno popunjene prijave i nekompletni zahtjevi se neće razmatrati.

Fond ne snosi nikakve troškove aplikanta, nastale sačinjavanjem i predajom aplikacije, i aplikant nema bilo kakva prava na naknadu bilo kakvih troškova po osnovu učešća na ovom javnom konkursu.

Sve dodatne informacije vezane za Javni konkurs, mogu se dobiti svakim radnim danom od 10:00 – 14:00h putem kontakt telefona: +387 (0)33 72 36 80 ili putem e-maila: info@fzofbih.org.ba.

Direktor

Safet Harbinja